

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

Z A K L J U Č A K

o odbacivanju Prijave koncentracije **privrednih subjekata**
„Franck“ društvo sa ograničenom odgovornošću za proizvodnju i trgovinu Sarajevo, dr.
Fetaha Bećirbegovića 45, 71 000 Sarajevo i „Branck Caffè“ d.o.o. Broćanac b.b., 88 390
Broćanac

Sarajevo,
januar, 2026. godine



Broj: UP-06-26-1-035-10/25
Sarajevo, 16.01.2026. godine

Konkurencijsko vijeće Bosne i Hercegovine, u skladu sa članom 25. stav (1) tačka e), a na osnovu člana 42. stav (2), u vezi s članom 12. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po Prijavi koncentracije podnosioca privrednog subjekta „Franck“ društvo sa ograničenom odgovornošću za proizvodnju i trgovinu Sarajevo, dr. Fetaha Bećirbegovića 45, 71 000 Sarajevo, koje zastupa na osnovu punomoći advokat Amar Bajramović, Vrazova 8., 71 000 Sarajevo, zaprimljenoj dana 08.10.2025. godine pod brojem: UP-06-26-1-035-1/25, na 39. (tridesetdevetoj) sjednici održanoj dana 16.01.2026. godine, donijelo je:

ZAKLJUČAK

1. Odbacuje se Prijava koncentracije privrednog subjekta „Franck“ društvo sa ograničenom odgovornošću za proizvodnju i trgovinu Sarajevo, dr. Fetaha Bećirbegovića 45, 71 000 Sarajevo, radi nepostojanja obaveze prijave namjere koncentracije, u smislu člana 14. stav (1) Zakona o konkurenciji.
2. Obavezuju se privredni subjekt „Franck“ društvo sa ograničenom odgovornošću za proizvodnju i trgovinu Sarajevo, dr. Fetaha Bećirbegovića 45, 71 000 Sarajevo, da uplati administrativnu taksu u ukupnom iznosu od 1.000 KM u korist Budžeta institucija Bosne i Hercegovine.
3. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 08.10.2025. godine zaprimilo Prijavu namjere koncentracije broj: UP-06-26-1-035-1/25, u skladu sa članom 16. Zakona o konkurenciji ("Službeni glasnik BiH", br. 48/05, 76/07 i 80/09), od strane podnosioca „Franck“ društvo sa ograničenom odgovornošću za proizvodnju i trgovinu Sarajevo, dr. Fetaha Bećirbegovića 45, 71 000 Sarajevo (u daljem tekstu: FRANCK ili Podnosilac prijave) u vezi sa potpisanom Okvirnim ugovorom u vezi sa kupovinom nekretnina, opreme, intelektualnog vlasništva, receptura i zaliha društva „Branck Caffè“ d.o.o. Broćanac b.b., 88 390 Broćanac (u daljem tekstu: BRANCK CAFFE). Prijava namjere koncentracije je podnesena putem punomoćnika odvjetnika Amara Bajramovića, Vrazova 8., 71 000 Sarajevo. Također, dana 06.11.2025. godine, zaprimljena je samoinicijativno dopuna Prijave broj: UP-06-26-1-035-2/25.

Prijave namjere koncentracije se podnosi na osnovu Okvirnog ugovora u vezi sa kupovinom nekretnina, opreme, intelektualnog vlasništva, recepture i zaliha društva BRANCK CAFFE d.o.o. potpisanog dana 25.09.2025. godine, broj OPU-IP-705/2025 (u daljnjem tekstu: Okvirni ugovor), između podnosioca prijave Franck, kao kupca (potpisan od strane advokata Amara Bajramovića, po punomoći), i društva BRANCK CAFFE d.o.o. (potpisan od strane Slavena Petrovića, direktora bez ograničenja ovlaštenja, prodavac 1.) i g-dina Branka Ćuk (prodavac 2.).

Dana 17.11.2025. godine, Konkurencijsko vijeće je zatražilo dopunu Prijave aktom broj: UP-06-26-1-035-3/25, a dana 21.11.2025. godine zaprimljena je dopuna kako je traženo pod brojem: UP-06-26-1-035-4/25.

Također, radi pojašnjenja činjenica potrebnih za rješavanje predmetne pravne stvari dana 18.12.2025. godine zatražena je dopuna prijave broj: UP-06-26-1-035-5/25. Dana 23.12.2025. godine, pod brojem: UP-06-26-1-035-6/25 zaprimljene su tražene informacije, i obrazloženja od strane podnosioca Prijave.

Dana 30.12.2025. godine zaprimljena je pod brojem: UP-06-26-1-035-7/25, Urgencija za rješavanje predmeta od strane podnosioca Prijave.

Uvidom u podnesenu Prijavu Konkurencijsko vijeće je utvrdilo da je ista kompletna, u smislu člana 30. Zakona o konkurenciji («Službeni glasnik BiH», br. 48/05, 76/07 i 80/09) (u daljem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracije privrednih subjekata („Službeni glasnik BiH“, broj 30/10).

Konkurencijsko vijeće je iz Prijave utvrdilo sljedeće činjenice:

Prijava koncentracije je podnesena u zakonom propisanom roku, u smislu člana 16. stav (1) Zakona i da je Prijava potpuna u smislu člana 30. Zakona, te da sadrži dovoljno informacija i dokaza za dalje postupanje. Konkurencijsko vijeće je Podnosiocu prijave izdalo Potvrdu o prijemu uredne i kompletne Prijave, u smislu člana 30. stav (3) Zakona, dana 15.01.2026. godine broj: UP-06-26-1-035-8/25.

1. Učesnici predmetne koncentracije

Učesnici koncentracije su privredni subjekti: „Franck“ društvo sa ograničenom odgovornošću za proizvodnju i trgovinu Sarajevo, dr. Fetaha Bećirbegovića 45, 71 000 Sarajevo i „Branck Caffè“ d.o.o. Broćanac b.b., 88 390 Broćanac (Posušje).

1.1. Privredni subjekt FRANCK

Privredni subjekt „Franck“ društvo sa ograničenom odgovornošću za proizvodnju i trgovinu Sarajevo, dr. Fetaha Bećirbegovića 45, 71 000 Sarajevo, Bosna i Hercegovina, registrirano pod registarskim (matičnim) brojem: 65-01-0175-12. Osnivač FRANCK je Franck d.d. Zagreb, sa sjedištem u ulici Vodovodna ulica 20, 10000 Zagreb, Republika Hrvatska, MBS 080000209, sa udjelom u visini od 100%, a lice ovlašteno za zastupanje upisan je Edin Škaljić, direktor.

Osnovna registrovana djelatnost privrednog subjekta FRANCK obuhvaća proizvodnju i distribuciju prehrambenih proizvoda, sa naglaskom na kafi (mljevena, instant, mješavine espresso), čajevima (biljni, voćni i crni čajevi), kakao i napici na bazi kakaa, začine (razne vrste začina za domaćinstvo i ugostiteljstvo), snack proizvodi (grickalice).

FRANCK posluje preko dva kanala prodaje, i to trgovina (trgovački lanci, tradicionalne trgovine i lokalni kupci) i horeca (hoteli, restorani i kafići).

FRANCK nema povezanih društava na relevantnom tržištu, tj. na tržištu Bosne i Hercegovine.

1.2. Privredni subjekt BRANCK CAFFE

BRANCK CAFFE d.o.o., društvo sa ograničenom odgovornošću, organizovano i osnovano u skladu sa propisima Bosne i Hercegovine, sa sjedištem u ulici Broćanac b.b., 88390 Broćanac, Bosna i Hercegovina (općina Posušje), registrovano pod registarskim (matičnim) brojem 64-01-0105-09.

Osnovna registrovana djelatnost privrednog subjekta BRANCK CAFFE je uvoz, proizvodanja i veleprodaja proizvoda od kave.

Osnivači, članovi društva BRANCK CAFFE su fizička lica g. Krasnodar Petrović, sa prebivalištem na adresi Kralja Tvrtka 8, Posušje, Bosna i Hercegovina - sa udjelom vlasništva od 76% i g. Branko Ćuk, sa prebivalištem na adresi Broćanac 217, Broćanac, Bosna i Hercegovina, sa vlasništvom 24% udjela društva.

(**)¹

2. Pravni osnov koncentracije

U skladu sa članom 12. stav (1) tačka b) Zakona o konkurenciji, pravni osnov koncentracije predstavlja sticanje kontrole ili prevladajućeg uticaja jednog privrednog subjekata nad poslovanjem drugog, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata, i to sticanje kupovinom većine dionica ili udjela osnovnog kapitala, sticanje većine prava glasa ili na drugi način u skladu sa odredbama zakona.

U konkretnoj koncentraciji predviđeno je preuzimanje poslovanja društva BRANCK CAFFE od strane Podnosioca prijave, putem tzv. *asset deal-a*.

Pravni osnov koncentracije je **Okvirni ugovor** u vezi sa kupovinom nekretnina, opreme, intelektualnog vlasništva, recepture i zaliha društva BRANCK CAFFE d.o.o. broj: OPU-IP-705/2025 zaključen dana 25.9.2025. godine.

U skladu sa predmetnim Okvirnim ugovorom FRANCK će, a nakon ispunjenja preduslova i nakon potpisivanja posebnih i pojedinačnih ugovora, preuzeti poslovanje društva BRANCK CAFFE koje se odnosi na proizvodnju i prodaju kafe i proizvoda od kafe (pod žigovima „BRANCK“ i „BRANCK CAFFE“), a koje podrazumijeva i sticanje prava vlasništva nad nekretninama (poslovna zgrada sa pržionicom kafe i više zemljišnih parcela u K.O. Bašići, Broćanac, te nekretnine u vlasništvu Branka Ćuka), pokretnu imovinu, recepture i tehnološke procese proizvodnje i zalihe, kao i sedam radnika koji su do sada bili u radnom odnosu sa BRANCK CAFFE.

3. Relevantno tržište učesnika koncentracije

¹ Podaci predstavljaju poslovnu tajnu, u smislu člana 38. Zakona o konkurenciji.

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu osobito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Društvo BRANCK CAFFE bavi se proizvodnjom, veleprodajom i distribucijom kafe (mljevena, instant, mješavine, espresso) na teritoriji Bosne i Hercegovine. BRANCK CAFFE proizvodi proizvode od kave koji se prodaju pod sljedećim brendovima (tj. registriranim žigovima): “BRANCK CAFFE”, “BRANCK CAFFE SPECIAL”, “BRANCK CAFFE GOLD”, “BRANCK”, “BRANCK CAFFE 3u1 CLASSIC” i “BRANCK caffe”.

S obzirom da su i FRANCK i BRANCK CAFFE aktivni na tržištu uvoza, proizvodnje, veleprodaje, maloprodaje (mljevena, instant, mješavine, espresso), na osnovu podataka iz Prijave relevantno tržište proizvoda u konkretnom slučaju je: tržište proizvodnje i prodaje kafe (mljevena, instant, mješavine, espresso).

Konkurencijsko vijeće je kao relevantno geografsko tržište predmetne koncentracije odredilo tržište Bosne i Hercegovine.

Slijedom navedenoga relevantno tržište predmetne koncentracije je tržište proizvodnje i prodaje kafe (mljevena, instant, mješavine, espresso) na području Bosne i Hercegovine.

4. Obaveza prijave koncentracije

U skladu sa članom 14. stav (1) tačke b) Zakona, obaveza prijave koncentracije postoji kada ukupni godišnji prihodi svakog od najmanje dva privredna subjekta učesnika koncentracije ostvareni prodajom roba i /ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihov zajednički udjel na relevantnom tržištu veći od 40,0%.

Ukupni godišnji prihodi privrednih subjekata učesnika koncentracije za 2024. godinu, kao godinu koja je prethodila koncentraciji, u skladu sa članom 14. Zakona su prikazani u *Tabeli 1.* kako slijedi:

Tabela 1.

	BRANCK CAFFE	FRANCK	
Bosna i Hercegovina (BAM)	7.613.488,00	43.764.180,00	

Izvor: Podaci iz Prijave

Prema podacima iskazanim u Tabeli br. 1. učesnici koncentracije u 2025. godini su ostvarili ukupan godišnji prihod koji ne podliježe obavezi prijave koncentracije, iz razloga što

privredni subjekt BRANCK CAFFE nije ostvario prihode u Bosni i Hercegovini u iznosu većem od 8.000.000,00 KM.

Procjene tržišnih udjela učesnika koncentracije, i njegovih glavnih tržišnih konkurenata na relevantnom tržištu u Bosni i Hercegovini (uvoz, proizvodnja i maloprodaja kave – mljevena, instant, mješavine, espresso), prikazani su, u Tabeli br. 2.

Tabela 2.

Redni br.	Privredni subjekti	Tržišni udjeli %
1.	(**)	(**)
2.	(**)	(**)
3.	(**)	(**)
4.	(**)	(**)
5.	(**)	(**)
6.	(**)	(**)
7.	(**)	(**)
8.	(**)	(**)
9.	(**)	(**)
10.	(**)	(**)
11.	(**)	(**)
12.	(**)	(**)
13.	(**)	(**)
14.	(**)	(**)
15.	(**)	(**)
16.	(**)	(**)
17.	(**)	(**)

Izvor: Podaci iz Prijave (AC Nielsen d.o.o.)

(**)

Prema podacima dostavljenim u Prijavi, učesnici koncentracije u 2024. godini su ostvarili ukupan godišnji prihod koji ne podliježe obavezi prijave koncentracije, kao i da ukupni tržišni udio učesnika koncentracije ne prelazi 40%.

5. Ocjena predmetne transakcije

Članom 12. stav (1) Zakona o konkurenciji propisano je da se pod pojmom koncentracije smatra:

- a) spajanje ili pripajanje nezavisnih privrednih subjekata ili dijelova privrednih subjekata;
- b) sticanje kontrole ili prevladajućeg uticaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata;
- c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.

Analizom dostavljenih podataka i dokumentacije, Konkurencijsko vijeće je utvrdilo da predmetna transakcija ne ispunjava uslove iz člana 14. stav (1) tačke a) i b) Zakona jer učesnici koncentracije nisu ostvarili prihode za kontrolu koncentracije, te istovremeno njihovi tržišni udjeli ne prelaze 40% na relevantnom tržištu Bosne i Hercegovine.

Na osnovu navedenog, podnosioci prijave nisu bili u obavezi podnijeti prijavu koncentracije u smislu člana 12. stav 1. Zakona, te je Konkurencijsko vijeće odlučilo kao u tački 1. dispozitiva ovog Zaključka.

6. Administrativna taksa

Podnosilac prijave na ovaj Zaključak, u skladu sa članom 2. tarifni broj 108. tačka d) Odluke o administrativnim taksama u vezi procesnih radnji pred Konkurencijskim vijećem («Službeni glasnik BiH», br. 30/06 i 18/11) je dužan platiti administrativnu taksu u ukupnom iznosu od 1.000,00 KM, u korist Budžeta institucija Bosne i Hercegovine.

7. Pouka o pravnom lijeku

Protiv ovog Zaključka nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

Predsjednica

Ninela Salihbašić

Dostaviti:

- Podnosiocu prijave, putem punomoćnika
- u spis predmeta;

